

Escrito por Alvaro Peralta
Luns, 29 Outubro 2012 23:59



Espallados entre unha morea de entullo nas instalacións da antiga canteira de Vilas (Morgadás), membros da Plataforma pola protección da Serra do Galiñeiro atoparon recipientes con líquidos inflamables e tóxicos abandonados no lugar. O achado foi posto en coñecemento da Policía Local de Gondomar a que segundo informaron esta tarde dende a Plataforma, fixo a correspondente notificación ás autoridades do SEPRONA. Os bidóns, de diferentes dimensións, conterían aceites, valvulina e gasolina segundo os veciños

A presenza destes produtos tóxicos nunha canteira que deixou de funcionar hai anos, preocupa ao colectivo polo inminente perigo que os mesmos representan. Denuncian que o achado evidencia a falla dos debidos controis por parte das autoridades competentes. Por outra banda, o xeito de que a advertencia ás autoridades foi feita hai máis de 20 días, e que aínda os líquidos estean sen retirar do lugar afonda o estado de alerta na zona.

O achado non é un feito illado. A Asociación A Groba leva identificados e xeolocalizados [na súa web 160 puntos ilegais](#) de vertedoiros incontrolados, acumulación de entullo, lixo e produtos contaminantes en todo o Val Miñor. Un control que ante a falla de resposta das administracións públicas están a desenvolver os propios membros da asociación coa colaboración de veciños da bisbarra.

Denuncian achado de bidóns con produtos inflamables nunha canteira abandonada na Serra do Galiñeiro

Escrito por Alvaro Peralta
Luns, 29 Outubro 2012 23:59

